

14 JUL 2002

Mahathir-Fiesta (Bergambar)

PM KUNJUNGI FIESTA MAKANAN DAN BUAH-BUAHAN 2002

KUALA LUMPUR, 14 Julai (Bernama) -- Perdana Menteri Datuk Seri Dr Mahathir Mohamad dan Datin Seri Dr Siti Hasmah Mohd Ali malam ini mengunjungi Fiesta Makanan dan Buah-Buahan 2002 - Citrarasa Malaysia, yang berlangsung di halaman Pusat Pelancongan Malaysia di Jalan Ampang di sini.

Mereka meluangkan masa kira-kira dua jam untuk bermesra dengan orang ramai sambil menyaksikan persembahan hiburan dan menikmati hidangan makanan.

Antara lainnya mereka menyaksikan persembahan Orkestra Alaoui dari Casablanca, Maghribi, sebuah kumpulan muzik yang mendendangkan lagu-lagu berirama Andalusia.

Orkestra itu yang dibawa oleh Pelancongan Malaysia dan Yayasan Al-Bukhari pernah memberi persembahan kepada Dr Mahathir semasa beliau melawat Maghribi, pada April lepas.

Perdana Menteri dan isteri turut menyampaikan sijil "Malaysian Book of Records" kepada sekumpulan 70 orang jurumasak (Chef) yang berjaya mencatatkan rekod menggoreng Kway Teow selama 50 jam tanpa henti.

Kumpulan jurumasak dari beberapa hotel di sekitar ibukota itu adalah daripada Persatuan Jurumasak Malaysia. Mereka mula menggoreng Kway Teow mulai pukul 9 malam Jumaat (12 Julai) secara berganti-ganti.

Sungguhpun hari ini adalah hari terakhir fiesta itu, orang ramai tetap memberi sambutan hangat dengan membawa keluarga untuk makan-makan selain membeli buah-buahan tempatan untuk dibawa pulang.

-- BERNAMA

AFY AFY PR